

Wólbna namołwa wozjewjena

Čorny Chołmc (SN/at). Namołwu k wólbam demokratisce legitimowaneho ludoweho zastupnistwa Serbski sejm je wólbny nawoda dr. Hagen Domaška we wobłuku Krabatoweho swjedženja wčera w Čornym Chołmcu wozjewił. Doba listowych wólbow skónči so 3. nowembra w 10 hodź. Kaž z wólbneho wozjewjenja wuchadźa, su wólbokmani wšitcy Serbja, kotřiž so wo zapisanje do wolerskeho zapisa požadaja a so tak jako tajcy wuznawaja. Woni dyrbja na poslednim dnju listowych wólbow staćan abo staćanka Zwjazkoweje republiki Němskeje być a 16. žiwjenske lěto zakónčene měć.

Wo zapis do wolerskeho zapisa móžeš so z formularom z wólbneho flajera postalisce (Wólbny wuběrk do Serbskeho sejma, Hłowna 9, 01920 Njebjelčicy), e-mailnje (*wolbny-wuberk.serbski-sejm@mailbox.org*) z online-formularom (*www.serbski-sejm.de*) abo ze zapisanjom do wotpowědnych lisćin požadać.

Je wotpohladane, zo zestaja so přichodny Serbski sejm z dwanaće delnjoserbskich a z runje telko hornjoserbskich zapóslancow. Za kóždu z wobeju skupin ma woler maksimalnje tři hłosy.